

Ehemaligenreise 2013 in den Schwarzwald

Mit de Ehemalige go reise, das isch de Hit,
mier gönd zwor erscht zum zweite Mol mit.
S' letscht mol sind mier em Wallis zue
diesmol züchts üs in Schwarzwald ue.

De Stefan chunnt pünktlich mit em Car,
s'Rhintal durab sind d'Lüt parat.
Über Rhineck – Flawil gohts em Toggeburg zue,
z'Kirchberg gnüssend mier s`Zmorge in aller Rueh.

Scho bald goht witer üseri Reis,
noch Ittingen im Thurgau, hei wie isch das heiss.
Uf em Rundgang durch d'Stallige, s'Kloster und de Garte,
händ mier vill Interessants über Kartüser erfahre.

Witer gohts em Schwarzwald zue
vor Triberg schlüpf ich i mini Wanderschueh.
Mier laufend Dütschlands höchste Wasserfäll entlang,
und fahred denn nach Gengenbach im Kienzigtal.

Noch em I-checka und em feine Nachtessen gohts no i d'Stadt,
Uf em Rundgang mit em Nachtwächter ischs intressant und sauglatt.
Am Zischtig isch denn volls Programm,
mit Besichtigung vo zwei Betrieb, de Glashütte und Wiidegustation.

Eckhard Schmieder vom Pinzbachhofweiss vill Intressants z'verzella,
über landw. Politik, s'Kienzigtal mit sine Sitetäler und sin Hof im Speziella.
Au bim Uli Müller vom Ramsteinerhof,
isch mit Feriewohnige, Holzschnitzelheizig, Back- und Brennhüsli immer vil los.

Im Schwarzwaldhotel erwartet üs wider es tolls Büffet zum Znacht,
mit Musig, singe, schunkle und tanze isch schnell Mitternacht.
Am morghe heisst packe, es letschsmol schwimme im Bad,
noch em Zmorge sind alli pünktlich parat.

Ein Car fahrt noch Freiburg zur Stadtbesichtigung,
de Zweit hät bi de Schwarzwaldmilch- Fabrik en Termin.
Zur Marktscheune in Berghaupten bringt üs de dritti Car,
die Uswahl a Schwarzwälder-Produkt isch wunderbar.

Am Nomittag wandered die eine durch d'Ravennaschlucht ue,
mier andere fahred derwil em Titisee zue.
Bald heisst zum letschtemol iistige und heiwärts goht d'Fahrt,
z'Kirchberg isch de Znacht scho parat.

Jetzt heisst Abschied neh, me seit sich tschau und schüttlet d'Händ,
alles Schöni hät halt emol es End.

Em Team Holestei-Reise und em Vorstand es Dankeschön,
für die 3 tolle Täg und d'Organisation.
Min Maa und li sind jetzt zum zweite mol uf Ehemalige Reis gsi,
aber li glaub mier sind au bim nächschte Mol wider debi.

Vreni Lenherr- Christe, Gams